

Pesawat MAS Dalam Penerbangan Ke Beijing Hilang, Usaha Mencari Dilancarkan Bernama
8 Mac, 2014

KUALA LUMPUR, 8 Mac (Bernama) -- Operasi mencari dan menyelamatkan dilancarkan bagi menjejak pesawat Malaysia Airlines yang dilaporkan hilang Sabtu semasa dalam penerbangan dari Kuala Lumpur ke Beijing, kata ketua pegawai eksekutif kumpulan MAS Ahmad Jauhari Yahya.

Kali terakhir isyarat daripada penerbangan MH370 itu dikesan ialah di 120 batu nautika di timur Kota Baharu di perairan Laut China Selatan, dan tiada petanda kecemasan daripada pesawat B777-200 dengan 239 orang dalam pesawat itu.

"Kami telah menghubungi pihak berkuasa Malaysia dan pihak berkuasa Malaysia juga telah menghubungi pihak berkuasa Vietnam kerana ia (pesawat itu) sebenarnya dalam kawasan bersempadan antara ruang udara Malaysia dan Vietnam," katanya kepada pemberita.

MAS berkata penerbangan MH370 itu terputus hubungan dengan Pusat Kawalan Trafik Udara di Subang pada 2.40 pagi, kira-kira dua jam selepas ia berlepas.

Pesawat yang membawa 227 penumpang, dua daripadanya bayi dan 12 kru, berlepas dari Lapangan Terbang Antarabangsa Kuala Lumpur (KLIA) pada 12.41 pagi dan dijadual mendarat di Beijing pada 6.30 pagi.

-- BERNAMA

Copyright © 2014 BERNAMA

Source: <http://www.bernama.com/bernama/v7/bm/newsindex.php?id= 1020256>